

Nos Historia Nos Herencia

Bida Musical di Robert JeanD'or

Robert Hubert JeanD'or a nacedia 10 di Mei 1954 y ta yiu di Francisco y Cecilia JeanD'or- Bermudez. Un famia di 11 ruman y mas cu claru musical. Robert a nace y crece den e bario di Madiki. Kisas hopi hende no sa cu Robert su nomber di cariño ta Obi. Robert ta casa cu Vivian Geerman y Robert tin dos yiu cu ta Robert Reiner y Anoushka. Porcierto Anoushka ta e prome Reina di Tumba di Aruba.

Bida Musical

Robert su bida musical ta cuminsa na cas cerca su tata. Robert tabata admira e habilidad di toca guitarra di su tata. Francisco JeanD'or tabata un excelente tocador di guitarra. E tata a scirbi tur e akkoordnan den un schrift y na un edad di 6 aña Robert tabata practica esakinan ariba su cuarta y despues guitarra. Robert por a pasa henter dia ta scucha musica na radio y ta bati man den clave ariba tur e ritmo cu e por a scucha.

Robert ta inicia su carera musical cu e grupo di aguinaldo "Las Blancas Palomitas" maneha pa Severiano Luidens. E lugar cu "Las Blancas Palomitas" tabata train ta un barak na Tanki Leendert. Robert mes por a toca cuarta y guitarra. Mas despues Robert por a canta un cancion "El Batayon" cu e grupo.

Robert ta conta cu e manera cu e siña toca baho tabata na un manera masha peculiar. E grupo di aguinaldo "Blanca Palomitas" mester a haci un presentacion na Seri Noca y a bahista di e grupo no por a toca. Vicente Kelly e tempo ey a yuda Robert cu e akkoordnan y asina Robert a toca full e



presentacion ariba baho. Robert ta sigui desaroya su mes musicalmente y ta bira e bahista principal di e banda popular den añanan 70 "Los Juveniles".

Den "Los Juveniles" Robert a participa pa prome biaha como Cantante, bahista, compositor y arreglista. Robert y Los Juveniles ta konkista di 1976, 1977 y 1978 Rey di Tumba di Aruba su Carnaval. Na 1978 e tumba ganador tabata "E Bolobonchi".

Hopi di nos no sa cu e Tumba "E Bolobonchi" despues a wordo graba pa Joe Arroyo. Esaki a hala masha atencion di Johnny Ventura. Robert JeanD'or no ta para keto y ta sigui explora cu musica.

Na final di aña 1975 Robert a haci su prome grabacion "Ta di nos e ta" cu Los Juveniles. La Nueva Fuerza

Cu e banda La Nueva Fuerza, Robert ta sigui desaroya y na 1979 ta trece produccion manera

"Ban Bonse", "Ata mi cos", "Manera un wiel", "Slip e", "Bolonbonchi", "Pusha bai Aden", "M' Yega", "Canta cu mi awor".

Tur esakinan tabata exito tras di exito.

Oportunidad y trayectoria internacional

Hopi di nos na Aruba no ta corda of kisas sa cu Robert JeanD'or tabata apunto di forma parti di "El Gran Combo". Esaki ta na e momento cu Andy Montañez a bandona "El Gran Combo" y a bai forma parti di "La Dimension Latina".

Den un fiesta bailable di "El Gran Combo" na Caiqueto, Aruba, Robert ta subi ariba tarima hunto cu "El Gran Combo" y ta canta tur e exitonan cu Andy Montañez tabata interpreta. Mesora e rumornan a circula cu Robert lo bai forma parti di "El Gran Combo". Lamentablemente ya caba a firma contract cu Jerry Rivas. Na momento cu Andy Montañez cu Oscar de Leon ta bandona "La Dimension Latina" mesora a core busca Robert JeanD'or (hasta na su trabao) pero ya caba Robert tabata estableci na

República Dominicana cu "Los Hijos del Rey". (1979). Por a bisa cu hasta e conocido banda "Fania All Stars" tabata interesa den Robert.

Los Hijos del Rey

Cu e banda Los Hijos del Rey dirigi pa e maestro Dioni Fernández, Robert a graba merenguenan manera "Yo me Dominicanizo", "La Pilandera", "La Vacuna" y salsanan manera "La Puchula" y "El Viento".

Robert JeanD'or su popularidad ta sigui crece na República Dominicana cu Bobby Valentín tambe tabata interesa pa Robert forma parti di su banda. Cu Los Hijos del Rey Robert ta haci giranan grandi na República Dominicana,

Puerto Rico y New York. Robert ta regresa Aruba bek pa un temporada y na 1983 e maestro Johnny Ventura ta convence

Robert atrobe pa forma parti di su banda y asina ta bolbe graba algun merengue cu ta bira exitoso na Latina America. Na mes un aña 1983 Robert ta graba un album cu La Nueva Fuerza na Aruba. Cancionan manera "N' Ami un tiki", "Mi Banana", "Mi sueño", "T'abo", "Panama me tombe", "Aunque que digas que no", a bira exito di e album aki.

E volumen number dos di La Nueva Fuerza yama "Frio y Caliente" tambe a cosecha exito.

Robert JeanD'or y su orquesta

Na 1985 Robert ta forma su mes un orquesta "Robert JeanD'or y su orquesta" y ta graba salsanan manera "Pan con Café", "El Tirijala", "El Milagro", "Pellizco", "El Boracho", "Tómalo".

Na 1989 Robert ta bolbe produci un otro album y e cancion "Pa que baila Usted" a bira un éxito.

Na 1990 Robert hunto cu La Nueva Fuerza ta lansa e album Mi Chalapi cu tabata un exito completo. Na 1991 Robert ta produci un otro album "La Cerveza".

Studio di produccion

Robert JeanD'or no ta conoci solamente como musico di banda pero tambe e ta talentoso den studio di produccion. Robert a participa como corista, bahista, arreglista den un sin fin di grabacion pa artistanan internacional y local. Produccionan di Wilfrido Vargas, Juan Luis Guerra, Johnny Pacheco, Celia Cruz Altamira Banda Show, New York Band, Rubby Perez pa simple mente menciona algun. Robert tambe a participa den e produccion di e album "Bachata Rosa" di Juan Luis Guerra y su 4.40. E album aki a gana diferente premio den Grammy.

Presentacion internacional

Robert a dunar presentacion den Madison Square Garden na New York cu Los Hijos del Rey y Johnny Ventura. Na República Dominicana Robert a presenta varios biaha den Estadio Olímpico, Alto de Chavon, Palacio de Deportes, na Puerto Rico den e mahestuoso Coliseo di Roberto Clemente y na Festival Viñas Del Mar na Chile.

Sin conta un sin fin di presentacion na Miami.

Robert y su Solo Banda Show

Na 1990 Robert ta establece su mes na Aruba y asina Robert y su Solo Banda Show ta nace. Robert y su Solo Banda Show te cu awe ta cosecha exito tras di exito cu produccion local y hopi popular na fiestanan na Aruba. E banda ta existi pa alrededor di 30 aña. Robert y su Solo Banda Show te cu awe ta e banda cu semper a compaña e grupo di Carnaval Los Laga Bai durante e paradanan. Bon ambiente nunca tabata falta.

Na 2022 Robert ta trece su mas recien produccion "El Chuletón" ariba mercado.

Compila pa Roberto Croes

Nos Historia Nos Herencia